

**Aatsitassat pillugit ingerlatallu tamatumunnga
pingaarutillet pillugit Inatsisartut inatsisaata nr. 7, 7.
december 2009-meersup allannguuteqartinnissaa
pillugu Inatsisartut inatsissaat (aatsitassanut inatsit)
(Annikitsumik aatsitassarsiorluni misissuineq
piiaanerlu, akuersissummik peqarani aatsitassanik
katersisarneq piiaasarnerlu aammalu inuiaqatigiinni
piujuartussamik iluaqutaasumik
sunniuteqartitsisarneq pillugit il.il. aatsitassanut
oqartussaaneq pillugu maleruagassanik
allannguuteqartitsineq)**

§ 1

Aatsitassat pillugit ingerlatallu tamatumunnga pingaarutillet pillugit Inatsisartut inatsisaanni nr. 7, 7. december 2009-imeersumi (aatsitassanut ikummatissanullu inatsit) makkua allannguuteqartinneqarput:

1. § 1, imm. 2 imatut oqaasertalerneqassaaq:

"Imm. 2. Inatsisartut inatsisaatigut anguniagaassaaq suliniutit inatsimmut ilagitinneqartut isumannaallisaaneq, peqqissuseq, avatangiisit, pisuussutinik atuinermi inuiaqatigiinnilu piujuartitsineq eqqaarsaatigalugit naammassiniarneqartassasut aamma pissutsinut nallersunneqarsinnaasunut naleqquttumik naapertuuttumillu nunani tamalaani akuerisaasumik pitsaasumik ingerlatseriaatsit malillugit."

2. § 3-ip kingorna ilanngunneqarpoq:

"§ 3 a. Aatsitassanut oqartussaasut, tak. § 3, imm. 1, tassaapput Aatsitassanut Aqutsisoqarfik, tak. imm. 2, aamma Aatsitassanik Suliassaqarfinnut Avatangiisinut Aqutsisoqarfik, tak. imm. 3.

Imm. 2. Aatsitassanut Aqutsisoqarfik aatsitassanik suliassaqarfinnut nalinginnaasumik allaffissornikkut oqartussaavoq, avatangiisinut pissutsinut tunngasut ilanngunagpit, tak. imm. 3.

Imm. 3. Aatsitassanik Suliassaqarfinnut Avatangiisinut Aqutsisoqarfik (Avatangiisinut Aqutsisoqarfik) aatsitassanik suliassaqarfinnut tunngasuni avatangiisinut tunngasuni allaffissornikkut oqartussaavoq, tamakkununnga ilaallutik avatangiisinkit allanngutsaaliuineq, pinngortitamik allanngutsaaliuineq, avatangiisinut akisussaasuuneq aamma avatangiisinkit nalilersuisarneq.

Imm. 4. Aatsitassanut oqartussaasup avatangiisinut pissutsinut tunngasuni nalilersuisarnerni

aalajangiisarnernilu avatangiisinut sullissivimmit ataatsimit arlalinnilluunniit ilisimatuussutsikkut arlaannullu attuumassuteqanngitsup aalajangiinissamut nalilersuinerit missingiutillu tunngavigisarpai.

Imm. 5. Aatsitassanut suliassaqarfinnut tunngasuni ingerlatsineq oqartussatallu suliarinninnejq pisinnaatitsisummik pigisaqartup allallu oqartussamik ataatsimik attaveqaqatigiittarneq tunngavigalugu aaqqissunneqarpoq, oqartussamillu taassumannga nalunaarutit, allakkiat aalajangikkallu tamaasa il.il. tigusarlugit. Aatsitassanut Aqutsisoqarfipuq pisinnaatitsisummik pigisaqartup allallu inatsisartut inatsisaanni matumani attuumassuteqartut allat tungaannut aatsitassanut suliassaqarfit pillugit allaffissornikkut attaveqaqatigiittarneq isumagisarpai.

Imm. 6. Aatsitassanut Aqutsisoqarfik ingerlatsinermi oqartussatut ataqtigissaarisuuvoq, Avatangiisinullu Aqutsisoqarfimmit oqaaseqaatit aalajangikkallu pisariaqartut pissarsiarisarlugit. Suliassat sammineqarneri aalajangikkallu pillugit Avatangiisinut Aqutsisoqarfik aamma Aatsitassanut Aqutsisoqarfik ingerlaavartumik imminnit ilisimatseqatigiittuartassapput.

§ 3 b. Aatsitassanut Aqutsisoqarfimmi imaluunniit Avatangiisinut Aqutsisoqarfimmi aalajangiussamik maalaaruteqarneq Naalakkersuisunut maalaarutaasinnaavoq. Maalaarsinnaatitaasut tassaapput:

- 1) Suliami pineqartumi akuusoq.
- 2) Kikkut tamarmik, suliap pineqartup kinguneqarnissaanik pingaarutilimmik inuttut namminertut soqutigisaqartutut naatsorsuutigineqarsinnaasut.
- 3) Peqatigiffit aamma kattuffit, malittarisassiatik naapertorlugit sukisaarsarnikkut, avatangiisitigut aamma pinngortitakkut soqutigisarisanik imaluunniit inuiaqatigiinnut tunngasunik pingaarutilinnik soqutigisarisanik isumaginninnissamik siunertaqartut.

Imm. 2. Maalaaruteqarnissamut piffissarititaq sapaatip akunneri 6-inik sivisussuseqarpoq.

Naammagittaalliornissamut killissaliussaq aalajangiineq illuatungiusumut nalunaarutigineqarsimappat ullormit nalunaaruteqarfiusumit, aamma aalajangiineq tamanut ammasumik nalunaarutigineqarsimappat ullormit tamanut saqqummiunneqarfigisaanit naatsorsorneqassaaq. Naammagittaalliuiteqarnissamut killissaliussaq arfininngornermi imaluunniit nalliuutumi naasimappat, naammagittaalliuiteqarnissamut piffissaliussaq ulliinnarmut tulliuutumut sivtsorneqassaaq.

Imm. 3. Naammagittaalliutaasoq oqartussaasumut aalajangiisimasumut allaganngorlugu tunniunneqassaaq. Naammagittaalliuiteqarnissamut piffissaliussap naanerata kingorna piaernerpaamik oqartussaasup naammagitaalliutaasoq aammalu oqartussaasup aalajangiinera naammagittaalliutaasumullu nassuaatai Naalakkersuisunut nassitissavai.

Imm. 4. Akuersissutip, akuersissuteqarnerup imaluunniit immikkut ittumik akuersissuteqarnerup naammagittaalliutigineqarneri, Naalakkersuisut allamik aalajangiisimanngippata, kinguartitsinissamik sunniuteqassanngillat.

Imm. 5. Naammagittaalliuiteqarnissamut piffissaliussap iluani, akuersissutit, akuersissuteqarnerit aamma immikkut ittumik akuersinerit aalajangersimasut naammagittaalliuiteqarnissamut piffissaliussap naannginnerani atorneqassannginnissaat pillugu aalajangersakkanik Naalakkersuisut aalajangersaasinnaapput.

Imm. 6. Naalakkersuisut allamik aalajangiisimanngippata, peqqusissuteqarnerup imaluunniit inerteqquteqarnerup naammagittaalliutigineqarnera kinguartitsinissamik sunniuteqassanngilaq.

§ 3 c. Pissutsit §§ 3-3 b-mi taaneqartut pillugit Naalakkersuisut maleruagassanik erseqqinnerusunik aalajangersaasinnaapput, tamakkununnga ilaallutik Aatsitassanut Aqutsisoqarfimmit imaluunniit Avatangiisinut Aqutsisoqarfimmit aalajangerneqarsimasut ilutsit ilaat pillugit maalaarutit aamma

maalaarsinnaanermut killilersuutit pillugit, takukkilli imm. 2-5.

Imm. 2. Aatsitassanik misissuinissamut piiaanissamullu akuersissutit pillugit tunniussinerit, allannguutit pingaaruteqartut, tunisinerit, akuersissummillu utertitsineq aamma utertitsinissamut akuersinerit pillugit Naalakkersuisut aalajangiisartuupput.

Imm. 3. Pissutsit inuiaqtigiiinnut imaluunniit avatangiisinut pingaarutilimmik sunniuteqarsinnaasut pillugit Naalakkersuisunit aalajangerneqartarput, aalajangikkat aalajangersimasut Aatsitassanut Aqutsisoqarfimmit imaluunniit Avatangiisinut Aqutsisoqarfimmit aalajangiiffigineqartussanngorlugit Naalakkersuisut maleruagassanik aalajangiisimanngippata.

Imm. 4. Aatsitassanut Aqutsisoqarfip aamma Avatangiisinut Aqutsisoqarfip suliassai pisinnaatitaanerilu pillugit maleruagassanik erseqqinnerusunik Naalakkersuisut aalajangiisinhaapput, tamakkununnga ilaallutik taakku aalajangiisinhaanermut pisinnaatitaaffi, takukkilli imm. 2, 3 aamma 5.

Imm. 5. Misissueeqqaarnissamut akuersissutit, tak. kapitali 4, imaluunniit annikitsumik aatsitassarsiornissamut aatsitassanik misissuinissamut imaluunniit piiaanissamut akuersissutit pillugit aalajangikkat, tak. kapitali 8, Aatsitassanut Aqutsisoqarfimmit imaluunniit Avatangiisinut Aqutsisoqarfimmit aalajangerneqassapput, aalajangigassat inuiaqtigiiinnut imaluunniit avatangiisinut pingaarutilimmik sunniuteqartussaanngippata, tak. imm. 3.”

3. § 4-mi imm. 2-p kingorna immikkoortutut nutaatut ilanngunneqassaaq:

“*Imm. 3 Sammisaniq aalajangiussisoqartinnagu inuiaqtigiiinnut imaluunniit avatangiisinut pingaarutilimmik sunniuteqarsinnaasut pissutsit pillugit sammisanik Inatsisartut ataanni ataatsimiititaliamut pingaarutilimmut Naalakkersuisut ilisimatsitsissapput.”*

4. § 18, imm. 1, 1. pkt.-imi aamma § 18, imm. 2, 1. pkt.-imi ”pisinnaavoq”-mit ”pissaaq”-mut allanngortinneqassaaq.”

5. § 18-imi imm. 3-ip kingorna immikkoortutut nutaatut ilanngunneqarpooq:

“*Imm. 4. § 16 malillugu aatsitassarsiorluni misissuinissamut piiaanissamullu akuersissummi aalajangersarneqarsinnaavoq, pisinnaatitsisummik pigisaqartup aatsitassat Kalaallit Nunaanni piiarneqartut uninngasuutigisinhaanera aammalu inunnut Kalaallit Nunaanni aalajangersimasumik najugaqartuuusunut aammalu tamakkiisumik akileraartussaatitaasunut tuniniarsinnaanera. Inuit taamaattut namminneerlutik Kalaallit Nunaanni aatsitassanik suliareqqiisarniarpata imaluunniit allatut aatsitassanik Kalaallit Nunaanni inuussutissarsiuutit atuiniarlutik, tamanna pillugu piumasaqaatit aalajangersarneqarsinnaapput. Pisinnaatitsisummik pigisaqartup aatsitassanik tuniniaanera niuernermi akiusut aammalu niuernermi atugassarititaasut tunngavigalugit pissaaq.”*

Imm. 4 aamma 5 tamatuma kingorna tassaalissapput Imm. 5 aamma 6.

6. § 18, imm. 6 imatut oqaasertalerneqassaaq:

“*Imm. 6. Naalakkersuisut imm. 1-5-imi pissutsit pineqartut pillugit erseqqinnerusunik aalajangersakkanik aalajangiisinhaapput, ilanngullugit Kalaallit Nunaannit sulisartut, Kalaallit Nunaannit suliffeqarfut aamma inuit imm. 4-p ataani aaliangersakkanik sinaakkusorsorneqarnissaat pillugit.”*

7. § 32, imm. 2-7 imatut oqaasertalerneqassaaq:

“*Imm. 2. Annikitsunik ujaasinissamut atuinissamullu akuersissut (annikitsunut akuersissut) § 16, imm. 3-mi allassimasoqaraluartoq taamaallaat imm. 3-mi piumasaqaatinik naapertuutsitsisunut timitaliisutut inunnut, aammalu imm. 9-mi piumasaqaatinik naapertuutsitsisunut katersugaasivinnut taamaallaat akuersissutigalugit nalunaarutigineqarsinnaapput.*

Imm. 3. Annikitsunut akuersissut taamaallaat piumasaqaatinut timitaliisutut inummut makkuninnga

piumasaqaatinik naammassinnissimasunut nalunaarutigineqarsinnaavoq:

1) Inuk Kalaallit Nunaanni tamakkiisumik piffissami, ukiunik siuliinik tallimanik minnerpaamik ataannartumik inunniq nalunaarsuiffimmi najugaqarsimassaqq.

2) Inuk Kalaallit Nunaanni inunniq nalunaarsuiffimmi najugaqartuuvoq.

3) Inuk Kalaallit Nunaanni tamakkiisumik piffissami, ukiunik siuliinik tallimanik minnerpaamik ataannartumik tamakkiisumik akileraartussatut pisussaatitaasimassaqq.

4) Inuk Kalaallit Nunaannut tamakkiisumik akileraartussatut pisussaatitaavoq.

5) Inuk inersimalersimassaqq, aningaasaatiminillu tamakkiisumik atuisinnaaffeqarluni, aammalu tassuunakkut akilersuiunnaarsimassanani imaluunniit akiliisinhaajunnaarluni

nalunaarutigineqarsimassanani, imaluunniit tamatumunngaa sanilliunneqarsinnaasutut atugaqarani.

Imm. 4. Naalakkersuisut imm. 3, nr. 1-imi aamma 3-mi Kalaallit Nunaannut inuup attuumassuteqarnera aallaavigalugu naammaginartutut nalilerneqarpat, aammalu ilinniagaqarnermut tunngasunik patsiseqartumik imaluunniit assingusumik Kalaallit Nunaata avataani najugaqarsimappat ukiut minnerpaamik 5-inik piffissarititat pillugit piffisatigut piumasaqaataasunit tamakkiisumik imaluunniit ilaannakortumik sanioqqutsisinnaapput.

Imm. 5. Inuk annikitsunut akuersissut naapertorlugu pisinnaatitaaffeqartoq akuersissuteqarfittut piffissami tamarmi imm. 3-mi piumasaqaataasunik naammassinnissimassaqq.

Imm. 6. Annikitsunut akuersissut katersugaasivimmun tassaasumut Kalaallit Nunaata Katersugaasivia, imaluunniit katersugaasiveqarneq pillugu inatsisit naapertorlugit katersugaasivimmun akuerisaasumut nalunaarutigineqarsinnaavoq. Katersugaasivik kisermaassisinnaatitaaffeqanngitsumik annikitsunut akuersissummik taamaallaat nalunaarfigineqarsinnaavoq.

Imm. 7. Annikitsunut akuersissut naapertorlugu katersugaasivik pisinnaatitaaffeqartoq akuersissuteqarfiup nalaani tamarmi imm. 6, 1. pkt.-imi piumasaqaammik naammassinnissimassaqq.”

8. § 33, imm. 3-4, imatut oqaasertalerneqarput:

“ *Imm. 3. Annikitsumik aatsitassarsiornissamik akuersissut malillugu pisinnaatitsissummik pigisaqartoq, akuersissut malillugu ingerlutanut sulianut pisariaqartumik piginnaaneqassaaq aningaasaqarnikkullu tunuliaquaqassalluni. Pisinnaatitsissummik pigisaqartoq nalinginnaasumik niuernermi akiusut aamma niuernermi atugassarititaasut tunngavigalugit nalinginnaasumik iliuuseqartassaaq.*

Imm. 4. Annikitsumik aatsitassarsiornissamik akuersissut inummut ataatsimut imaluunniit inunniut ataatsimoorussisunut arlalinnut, tamamik ataasiakkaarlutik § 32, imm. 3-5 naapertorlugit pisinnaatitsissummik pigisaqartuunissamut piumasaqaatinik naammassinnissimasusanut tunniunneqarsinnaavoq. Taamaattorli annikitsumik aatsitassarsiornissamik akuersissut inunniut tallimanit (5) amerlanerusunut tunniunneqarsinnaanngilaq.”

9. § 34, imm. 2-7 imatut oqaasertalerneqassaaq:

” *Imm. 2. Kisermaassisinnaatitaaffeqarluni annikitsunut akuersissummut akuersissuteqarfiusoq 1 km² sinnerlugu annertussuseqarsinnaanngilaq.*

Imm. 3. Kisermaassisinnaatitaaffeqanngitsumik annikitsunut akuersissummut akuersissuteqarfiusumit immikkoortortat kisermaassisinnaatitaaffeqarluni annikitsunut akuersissuteqarfiusut imaluunniit annikitsunut akuersissuteqarfinnuit ilaasut.

Imm. 4. Kisermaassisinnaatitaanani annikitsunut akuersissummut akuersissuteqarfiusumut ilaangillat § 16 naapertorlugu aatsitassarsiornermut imaluunniit aatsitassanik atuinermut immikkoortortat akuersissuteqarfiusut imaluunniit akuersissummik nalunaaruteqarfiusut.

Imm. 5. Qaqugukkulluunniit atuutsinneqarsinnaasunik annikitsunut akuersissutaasut amerlanerpaaffissaat pillugit Naalakkersuisut aalajangersakkanik aalajangiussisinhaapput.

Imm. 6. § 33 naapertorlugu annikitsumik akuersissut piffissamut ukiut 3-t tikillugit nalunaarutigineqarsinnaavoq.

Imm. 7. Pisinnaatitaaffeqartoq, kisermaassisinnaatitaaffeqarluni annikitsumik akuersissuteqarnermi nalaani aningasarsiutigineqarsinnaasunik nassaarisaniq takussutissimappat nassaarisanillu atuinermerik aallartitsisimappat, sinnerisigullu akuersissummi nalunaarsukkatut piumasaqaataasut naammassineqarsimappata ukiut 10-t tikillugit akuersissuteqarfiusup sivitsortarnissaanut pisinnaatitaaffeqarpoq. Akuersissuteqarfittut piffissap tamarmiusup ukiut 30 qaangersimassangilaat.”

10. § 35 imatut oqaasertalerneqassaaq:

” § 35. Pisinnaatitaaffeqartoq tassaappat inuk ataaseq, annikitsunut akuersissut taamaallaat taassuminnga inummit imaluunniit taassuma inuup inoquaanit ujarassiorneq atuinerlu ingerlanneqarsinnaapput, taamaattorli imm. 4 aamma 5 takukkit.

Imm. 2. Pisinnaatitaaffeqartoq tassaappat inunnik arlalinnik inuttaqartoq, annikitsunut akuersissut taamaallaat taakkuninnga inunnit imaluunniit taakkua inuit inoquaani ujarassiorneq atuinerlu ingerlanneqarsinnaapput, taamaattorli imm. 4 aamma 5 takukkit.

Imm. 3. Pisinnaatitaaffeqartoq tassaappat katersugaasivik, annikitsunut akuersissut taamaallaat katersugaasiviup pisortaqarfiani ilaasortaasunit imaluunniit katersugaasivimmi aalajangersimasutut atorfefqartunit ujaasisoqarneq atuinerlu ingerlanneqarsinnaapput, taamaattorli imm. 5 takuuk.

Imm. 4. Piffissami ataatsikkut akuersissuteqarfiusumi inunnik 9-nik tikillugit kisermaassisinnaatitaalluni annikitsumik akuersissummik pisinnaatitaaffeqartup suliaqartissinaneranut Naalakkersuisut akuersissummik nalunaaruteqarsinnaapput, taamaattorli imm. 5 takuuk.

Imm. 5. Ingerlatanik inuit 10-t sinnerlugit akuersissuteqarfiusumi piffissami ataatsikkut suliaqarsinnaatitaassanngillat. Inuit tassaappata pisinnaatitaaffeqartoq, pisinnaatitaaffeqartup pisortaqarfiani ilaasortaasut, pisinnaatitaaffeqartup atorfinitisitai, pisinnaatitaaffeqartup imaluunniit pisortap inoquatai ilaasortat, imaluunniit inuit allat pisinnaatitaaffeqartumit suliaqartitaasut pineqaraluarpataluunniit tamanna atuutissaaq.”

11. § 36, imm. 3-5 imatut oqaasertalerneqassaaq:

” Imm. 3. Kisermaassisinnaatitaaffeqarani annikitsunik akuersissutit naapertorlugin aatsitassarsiornermi ingerlatat taamaallaat assammik sakkut tigummiarneqarsinnaasut, mekaniskiungitsunik, soorlu assersuutigalugit kaattatut, qussaatatut, kuupiitut ikuttaatitullu ittunik suliarineqaaqusaapput, taamaattorli imm. 4 takuuk.

Imm. 4. Kisermaassisinnaatitaaffeqarani annikitsunik akuersissutillit annikitsumik qaartiterinermut akuersissummik Naalakkersuisut nalunaaruteqarsinnaapput. Taamatut akuersissuteqarneq naapertorlugu aatsitassarsiornermi ingerlatat aamma sakkut assassinluni atortut, mekaniskiusunik atugaqarluni ingerlanneqarsinnaapput, assersuutigalugit qillerutit, avitsissutit seqtserutillu atornerisigut, aammaluu annikitsumik qaartitserinikkut.

Imm. 5. Annikitsumik qaartiterinerup atorneqarnissaa aamma taassuminnga akuersissuteqarneq pillugit Naalakkersuisut aalajangersakkanik aalajangersuissapput.”

12. § 45 imatut oqaasertalerneqassaaq:

” § 45. Inuk Kalaallit Nunaanni aalajangersimasumik najugalik tamakkiisumillu akileraartussaatitaasoq (najugaqavissosq) akuersissummik tamatumunnga pisariaqartitsinngitsumik inuussutissarsiummut

atugassaanngitsumik aatsitassanik kaanngarsimasunik katersuisinnaavoq, taamaattorli §§ 45 c aamma 45 d takukkit.

Imm. 2. Imm. 1 naapertorlugu aatsitassat katersorneqarsimasut nioqqutiginissaat imaluunniit nioqqutiginissaat siunertaralugu suliarineqarnissaat kissaatigineqarpata aatsitassanik katersuivigisamut kapitali 8-mi maleruagassat naapertorlugit aatsitassanik atuinissamut annikitsunut akuersissummik qinnuteqartoqarsinnaavoq.

Imm. 3. § 16 naapertorlugu aatsitassarsiornermut imaluunniit aatsitassanik atuinermut kisermaassisinnaatitaaffeqarluni akuersissummut, imaluunniit § 33 naapertorlugu aatsitassarsiornermut imaluunniit aatsitassanik atuinermut kisermaassisinnaatitaaffeqarluni annikitsunut akuersissummut atasuuppat immikkoortumut imm. 2-mi pineqartumut annikitsunut akuersissummik nalunaaruteqartoqarsinnaanngilaq.

Imm. 4. Taamaattorli kisermaassisussaatitaanermut akuersissut naapertorlugu pisinnaatitaaffeqartumit allakkatigut akuersissut tamatumunnga nalunaarutigineqarsimappat, aammalu tamatuminnga qinnuteqarluni akuersissutip Naalakkersuisunut tunniunneqarneratigut uppernarsarneqarsinnaappat imm. 2-mi pineqartumut annikitsunut akuersissut nalunaarutigineqarsinnaavoq.”

13. § 45-ip kingorna ikkunneqassaaq:

” § 45 a. § 45, imm. 1 naapertorlugu najugaqavissoq tassunga akuersissummik piumasaqaateqanngitsumik ukiumut 100.000 kr.-t sinneragit aatsitassat tamakkiisumik nalingat annertunerungippat aatsitassanik kaanngarnikun aamma aatsitassanik piaanermik inuussutissarsiutigalugu katersuisinnaavoq, taamaattorli §§ 45 c aamma 45 d takukkit. Piianeq taamaallaat assassinrluni sakkut atortut atorlugit annikinnerusunik, mekaniskiunngitsunik, assersuutigalugit kaattatut, qussaatatut, kuupiitut ikuttaatitullu ittunik sakkqarluni pisinnaavoq.

Imm. 2. Imm. 1 naapertorlugu aatsitassat katersorneqartut imaluunniit piliarneqartut nalingat nioqquteqarfimmi akinut tunisinerni aammalu nioqquteqarfimmi piumasaqataasuni tunisaqarnermut akitut assingusumut akimut aalajangerneqassapput.

Imm. 3. Imm. 1 naapertorlugu aatsitassat katersorneqartut imaluunniit piliarneqartut nalingat tamarmiusoq ukiumut 100.000 kr.-t sinnersimappagit aatsitassat nalimikkut 100.000 kr.-t sinnerlugit annertunerusumik naleqartillugit Naalakkersuisunit nakkutigisaanikkut toqqortarineqassapput.

Imm. 4. Inuk imm. 3 naapertorlugu aatsitassanik toqqortaqarsimasoq immikkoortortamut aatsitassanik katersuiffigisamut imaluunniit piaaffigisamut kapitali 8-mi maleruagassat naapertorlugit aatsitassat atugarinissaanut annikitsunut akuersissummik qinnuteqartoqarsinnaavoq.

Imm. 5. Imm. 4-mi pineqartutut annikitsunut akuersissut nalunaarutigineqassappat Naalakkersuisut aatsitassat toqqortarineqartut pisinnaatitaaffeqartumut tunniutissavaat. Taamatut annikitsumik akuersissut nalunaarutigineqanngippat, imaluunniit toqqorsinerup ulluanit qaammatit 12-it qaangiutsinnagit annikitsumik akuersissummik taama ittumik nalunaaruteqarnissamut qinnuteqartoqarsimanngippat Naalakkersuisut aatsitassat toqqortarineqartut tunissavaat. Aatsitassanik tunisinermiit isertitat Nunatta Karsianut tussapput.

Imm. 6. Inatsisartut inatsisaata matuma atuutilernerata kingornatigut ukiumi 1. januaarimi atuutsilertutut imm. 1-imi aamma 2-mi aki 100.000 kr-usoq Kalaallit Nunaanni atuisartunut akigititat allattorsimaffianni allannguutaasunut naapertuutsillugu ukumoortumik iluarsineqartassaaq.

§ 45 b. §§ 45-45 a naapertorlugit § 16 naapertorlugu immikkoortortami aatsitassarsiornermut imaluunniit aatsitassanik atuinermut kisermaassisinnaatitaaffeqarluni akuersissummut ilaasumi, imaluunniit § 33

naapertorlugu aatsitassarsiornermut imaluunniit aatsitassanik atuinermut kisremaassisinnaatitaaffeqarluni annikitsunut akuersissummut ilaasumut katersuisoqarsinnaananiluunniit piiaasoqqaqusaanngilaq.

Imm. 2. Taamaattorli immikkoortortami taama ittumi katersuisinnaasoqarlunilu piiaasoqarsinnaavoq tamatumunnga akuersissutaasoq naapertorlugu pisinnaatitaaffeqartumit allakkatigut akuersissummik nalunaaruteqartoqarsimappat, tamannalu pillugu tamatuminnga qinnuteqartoqarneratigut akuersissutip Naalakkersuisunut tunniunneqarneratigut uppermarsarneqarsinnaappat.

§ 45 c. §§ 45-45 a naapertorlugit aatsitassanik katersugaqarsinnaanermut piiaasinnaanermullu ilaanggillat diamantit, safirit, rubnik, smaragdit, chrysoberylit, opali aamma aatsitassat radioaktiviusut.

Imm. 2. §§ 45-45 a naapertorlugit katersisinnaatitaanermit imm. 1-im i taaneqartunut naleqqiullugit aatsitassat allat ilaatinneqannginnerat pillugit Naalakkersuisut aalajangersakkanik aalajangiisinnaapput.

§ 45 d. §§ 45-45 a naapertorlugit aatsitassanik kaanngarsimasunik aamma aatsitassanik piianernut tunngasunik, ilanngullugit suliarinninnermut, inissiisarnernut, toqqortaqtarnernut, assartuussisarnernut, nioqquteqarnermut, nunap avataanut tunisinernut, nunamut eqquissuinermut aamma uppermarsaasersuinermut tunngasunik Naalakkersuisut erseqqinnerusunik aalajangersakkanik aalajangersaasinnaapput.

§ 45 e. § 33 naapertorlugu inuk annikitsunut akuersissummik nalunaaruteqarfiusimasoq Naalakkersuisunit akuersissuteqareernerup kingorna Kalaallit Nunaata sargata takutinniarnissaa siunertaralugu najugaqvissunut aamma takornarianut siulersugaqarluni angalaartitsinernik aaqqissuussaqarsinnaavoq.

Imm. 2. Imm. 1-im pineqartutut ingerlatat pillugit Naalakkersuisut erseqqinnerusunik aalajangersakkanik aalajangersaasinnaapput..

§ 45 f. Avammut annissaqarnissamik siunertaqarlutik najugaqvissuunngitsut aamma takornariat aatsitassanik katersueqqusaanngillat.”

14. Kapitali 16-ip qulequataa imatut oqaasertalerneqarpoq:

“Inuaqatigiinni piujuartussamik iluaqutaasumik sunniutaasussanik nalilersuineq (VSB) aamma inuaqatigiinni piujuartussamik iluaqutaasumik sunniuteqartitsinissaq pillugu isumaqatigiissutit”.

15. § 78-p kingorna kapitali 16-im i lanngunneqassaaq:

“**§ 78 a.** § 16 malillugu akuersissummi Naalakkersuisut piumasaqaatitut aalajangissavaat, pisinnaatitsisummi pigisaqartoq inuaqatigiinni akornutaanngitsumik piujuartussamik aamma pissutsit inuaqatigiinni aningaasarsiornermut tunngasut pillugit qanoq annertutigisumik isumaqatigiissutinik akuersissasoq eqquutsitsillunilu.

Imm. 2. Isumaqatigiissut imm. 1-im taaneqartoq pisinnaatitsisummi pigisaqartup § 18, imm. 1-4 malillugu pisinnaatitaaffinnik eqquutsitsinissaq pillugu isumaqatigiissutinut tunngasuusinnaavoq, ilaatigullu sulisartunik kalaallinik ilinniartitsinissaq imaluunniit ilinniartitseqqinnissaq pillugu malerugassanik imaqarsinnaalluni.”

16. § 86, imm. 3-mi 2. pkt.-ip kingornatigut uniffittut nutaatut ikkunneqassaaq:

“Pisinnaatitaaffeqartup taassuma suliffeqarfiutilittaasa, sullissinermik suliaqartuutitaasa, pilersuisuisa il.il. akileraartarnermut tunngasunik pissutsinut tunngasunik paasissutissiisarnissaannik allagaatinillu tunniussisarnissaasa, aammalu Kalaallit Nunaanni qazugumulluunniit atuuttutut maledugassanut naapertuuttunik akileraarutinik akiliisarnissaasa isumannaarinissaq pillugu Naalakkersuisut piumasaqaatinik aalajangersaasinnaapput imaluunniit aalajangiussaqarsinnaapput.”

- 17.** § 96, imm. 2, nr. 2mi, allanngortinneqarpoq “§§ 45-47” imaalillugu “§ 45, § 45a, imm. 1, 2. pkt., §§ 45b-45c kiisalu §§ 46-47”.
- 18.** § 96, imm. 2, nr. 3-imi, allanngortinneqarpoq “§ 45, imm. 6” imaalillugu “§ 45 a, imm. 3”.
- 19.** § 97, imm. 1-imi, allanngortinneqarpoq “§ 48” imaalillugu “§ 45 e, § 45 f, imm. 2, imaluunniit § 48”.

§ 2

Inatsisartut inatsisaat 1. januar 2013-imi atuutilerpoq.

Imm. 2. Inatsisartut inatsisaata atuutilernerani nalunaarutigeriikkatut aatsitassanik misissueqqaarnernut, ujaasinernut imaluunniit atuinernut akuersissutit atuutiinnassapput. Aammattaaq Inatsisartut inatsisaata atuutsinneqalernerani Inatsisartut inatsisaat akuersissutinut taama ittunut, akuersissutit taama ittut naapertorlugit pisinnaatitaaffeqartunut, kiisalu aatsitassanut inatsimmut ilaasunik ingerlatanut, taamaattorli imm. 3 takuuk.

Imm. 3. Inatsisartut inatsisaata matuma atuutsinneqalernerani aatsitassanut inatsimmi § 16 naapertorlugu nalunaarutigineqartutut aatsitassanik ujaasinissamut imaluunniit atuinissamut akuersissutinut Inatsisartut inatsisaanni § 18, imm. 4, inatsisartut inatsisaani matumani § 1, nr. 2 atuutinngilaq.

Taamaattorli aatsitassanut inatsimmi § 16 naapertorlugu akuersissutaasoq naapertorlugu Naalakkersuisut aamma pisinnaatitaaffeqartup ataatsip akornanni allamik annertussusilikkatut isumaqatigiissutaasumut, aammalu akuersissummut tapiliutip nalunaarutigineqarneratigut Naalakkersuisunit aalajangerneqartumut atuuttuunngilaq.

Namminersorlutik Oqartussat, ulloq 18. december 2012

Kuupik Vandersee Kleist

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviit

Naalakkersuisut

